

R GB 05-08 00170 BA208

bah

+WAWASAN MAJUKAN PERTANIAN+ MEMERLUKAN PERUBAHAN, KATA DR MAHATHIR

Wawasan

KUANTAN, 5 Ogos (Bernama) -- Datuk Seri Dr Mahathir Mohamad berkata, tema Hari Peladang, Penternak dan Nelayan Kebangsaan tahun ini +Wawasan Majukan Pertanian,+ memerlukan para peladang, penternak dan nelayan melakukan perubahan.

Perubahan itu bukan sahaja daripada segi pendekatan perancangan yang mantap tetapi yang lebih penting sikap mereka supaya lebih positif serta pengemblengan tenaga untuk membentuk +satu gagasan yang kuat dan dinamik, giat dan berdikari serta kukuh dan jujur.+

Sehubungan dengan itu, katanya, para peladang, penternak dan nelayan perlu berusaha menghadapi cabaran yang berlaku berikutan perubahan amalan perdagangan antarabangsa, perlindungan pasaran serta keupayaan berdaya saing di bidang pertanian.

+Cabaran ini perlu dihadapi dengan bijaksana dan memerlukan komitmen yang menyeluruh dalam usaha melaksanakan strategi peningkatan produktiviti sektor pertanian yang bercorak komersil,+ katanya dalam perutusan menerusi buku cenderamata sempena perayaan Hari Peladang, Penternak dan Nelayan Kebangsaan 1992 yang akan dirasmikannya esok, di Taman Pertanian Negeri, Bandar Indera Mahkota di sini.-- Lagi.

▼05/08/12-31MST

R GB 05-08 00199 BA209

bah

Wawasan 2 (akhir) Kuantan

Dr Mahathir berkata, negara sedang melalui dekad apabila perubahan sekitar berlaku dengan pesat. Kepesatan pertumbuhan ekonomi negara dan tempo pembangunan yang pantas pula memerlukan sektor pertanian bertindak lebih cekap, berdaya saing dan berdaya pegas untuk memenuhi keperluan pembangunan yang tinggi.

Menteri Pertanian Datuk Seri Sanusi Junid, dalam perutusannya pula berkata, +Wawasan Majukan Pertanian+ adalah berasaskan falsafah-falsafah pembanyunan seperti yang diilhamkan dalam Wawasan 2020.

+Walaupun matlamat Wawasan memberi penekanan kepada bidang perindustrian, kepentingan sektor pertanian tidak boleh dianggap ringan. Sektor-sektor lain, khususnya sektor pembuatan tidak akan dapat lari daripada bergantung kepada sektor pertanian,+ katanya.

Sektor pertanian perlu bergerak sebagai sektor yang dinamik, cekap dan berdaya komersil dan ia hanya akan tercapai jika peladang, penternak dan nelayan memiliki personaliti yang cenderung dengan sifat-sifat amanah, disiplin, berani, rajin dan setia.

Menteri Besar Pahang Tan Sri Khalil Yaakob pula berkata, pemilihan Pahang sebagai tuan rumah Hari Peladang, Penternak dan Nelayan Kebangsaan tahun ini adalah satu penghormatan kepada negeri itu.

Perayaan itu akan berlangsung selama enam hari mulai esok. Antara aturcara yang disediakan ialah Sukan Peladang, Penternak, dan Nelayan Kebangsaan dan Pesta Durian Pahang. -- Bernama.